

Video Wanita Umno marah Najib viral di Internet
The Malaysian Insider
August 10, 2015

Sebuah video yang mengkritik keras Presiden Umno Datuk Seri Najib Razak dengan mendakwa pemimpin tertinggi parti itu 'kencing' atau menipu rakyat menjadi viral di media sosial.

Dengan nada tinggi dan berbaur sindiran seorang anggota Wanita Umno, Anina Saaduddin, lantang menyuarakan pendapatnya di sebuah persidangan perwakilan Wanita Umno.

"Datuk Seri presiden dah kencing tiga juta ahli Umno. Dia kata 3 juta ahli Umno sokong penuh kepimpinan beliau.

"Saya minta Majlis Tertinggi Umno bawa Datuk Seri Najib 'pi' (pergi) berubat," katanya dalam dialek utara.

Namun, di sebalik kemarahannya, Anina menegaskan beliau tetap menyokong Umno dan akan terus mengundi Barisan Nasional (BN).

"Saya sokong Barisan Nasional. Demi Allah, saya Umno. Walau apa pun, saya pangkah Barisan Nasional," katanya dengan nada suara yang tinggi.

Wanita itu turut menegaskan, kritikan beliau adalah disebabkan rasa cinta dan sayangnya terhadap parti Melayu itu dan beliau tidak mahu dirinya dipertikai ekoran ucapan yang dibuatnya tersebut.

"Jangan pertikai kesetiaan saya kepada Barisan Nasional, kepada Umno. Tapi kita lihat kepada presiden kita yang sedang kencing kita setiap hari.

"Setiap hari kencing kita, keluar dekat televisyen merata-rata" katanya dengan nada marah dan loghat Kedah itu.

Rakaman ucapan beliau tersebut viral di laman Facebook dan setakat ini mendapat tontonan lebih 230,000 pengguna media sosial.

Tidak dapat dipastikan beliau ketika itu sedang menghadiri mesyuarat bahagian atau cawangan Umno yang mana satu. – 10 Ogos, 2015.

Copyright © 2015 Edge Insider Sdn Bhd

Source:

<http://www.themalaysianinsider.com/bahasa/article/video-wanita-umno-marah-najib-viral-di-internet>